



Die Aabrennte Fasnacht 2020

Dr Blocher frogt: «Wär wird jetzt Preesi? Treu und folgsam muess är syy.»
Und jede duggt sich in dr Hoffnig, dä Kelch gieng an iim verbyy.
Mir empfäale drum dr Rutschmaa als dr neuu Blocher-Knächt,
Als Noochfolg vo dr Röschtī kämt e Wurscht grad rächt.

«Isch dört Duchess of Sussex? Do isch dr Prinz Charles am Apparat.
Halb in Kanada, halb-in-Ängland,- sag was söll denn dä Spagat?
Kumm lieber zrugg, du Ami-Gööre und vergiss dy Freiheits-Drang,
Sunscht goots dir bald wie mir und d Mamme ziet dir d Oore lang.»

Au mir schtuune, wo im Köppel do die Milch um d Oore fliegt,
Faszinierend, wie dä Maa so schnäll e wyssi Weschte griegt.
E Milkshake zmitzt ins Gesicht, e männgge meint: «Wo fiert das numme hiï?»
Und mir hänn dänggt: «Schaad isch dä Dringg nit duuregfroore gsii.»

Im Zolli gits bi de Gorillas Strytt ums grosse Gummiband,
Vor Wuet brätscht so ne Silberrugge e Banane «Zäck!» an d Wand.
Dr Sam Käller luegt mit grossen Auge in dä Keefig dryy,
Und jetzt isch dä Aff im Juni an dr Art derbyy.

Vo Müülebärg do kunnt e Laschti, hundert Brennstäab sinn an Bord,
Dä suecht für syyni straalend Fracht verzwyflet non e sichren Ort.
E Blatz so einsam, dass kei Mensch me in Kontaggt kunnt mit dämm Drägg,
Jetzt het ändlig s Stücki Center e Verwändigswägg.

Oorebluete setzts am Schwingfescht, de höörsch kuum e graade Doon,
Dasch Biezer Buebe «Live on Stage», dr Gölä grunzt ins Mikrofon.
Dä verzellt eso vyyl Bullshit, dass de nümme sicher bisch
Wär dört dr Siigermuuni, und wär nur dr Hoornoggs isch.

Wär faart do übre Bärge und stüürt hässig richtig WEF, Davos?
S isch d Greta und si reist klimaneutral im sälberbaute Flooss.
Dr Trump kääm in dr Airforce One und das syg schaad meint si fruschtriert,
Well me Orange besser nit per Luftfracht transportiert.

Mir sinn dä Schüttelzug go teschte, s Schiinegchwüür vo Bombardier,
Nach fünf Minute hänn mir kötzlet und d Kneu dien ys hüt no wee.
Aber s Schlimmschte isch doch gsi, jä do verseit dä Zug komplett,
Won er zwüsche Chur und Basel z Züri ghalte het.

Mir kaufen ys zwei Fläschli Schämpis, eins das ka me gratis haa,
Hummerschwänz gits drei für zwei, Filet zum Pryys vo Cervelat,
Dasch nit dr Globus-Usverkauf, nei Sii hänn do dr falsch Verdacht,
Das gits im Konsi - well mir hänn dr Check Out sälber gmacht.

D Baselbieter Bank am Barfi: Hebe Si lir Sparbuech fescht.
Do heisst: «Dr Gäldfluss an dr Quelle heusche, das isch eifach s besch.
Und als Finanzusglyych do biete mir dr Basler Bangg grad aa,
Si chönne z Bämbeel hintrem Mischtschtogg e Filiale ha.»

Zwei Wuche Vaterschaftsurlaub? Do hänn mir grad schnäll Ferie buecht,
Und sin zwei Moonet uf Antalya, unsre Chef het numme gfluecht.
Mir heige das ganz falsch verstande und mir miesse sofort zrugg,
Doch s isch nit unsri Schuld, nei es isch die vom Thomas Cook.

Bim Sutter gits kei «Meitlibei» me, das isch für uns wirgglig schlimm.
Mir sin ind Filiale und hänn gjammeret mit dünner Stimm.
«Mir hätte so gärn Meitlibei!» Do kunnt d Verkäufere nit druss,
Und luegt ys aa und meint: «Das gsächt e bitzli komisch us.»

S Zündhölzli/ Brandloch e wunderbaari Fas-
nachtsbaiz mitten im Härz vo dr Frau Fasnacht.
Als Epizentrum vo dr Fasnacht und insbeson-
dere vom basler Schnitzelbanggwäse findsch
dä sicheri Haafe an dr Stadthusgass 22. Offen
isch s Zündhölzli/Brandloch am Mäntig, Zysch-
tig und Mittwoch ab em 6i z Oobe bis frie am
nägschte Morge.

www.aabrennte.com